



Selasa, 29 September 2020
Ogen: Markus 1:35



Ertoto ndengkehken Sora Tuhan



Kalak Kristen kesah pertendinna eme pertoton, adi la ertoto mate secara pertendin ras kinitekenna. I bas kita ertoto kita ngerana ras Tuhan bagepe megiken sora Tuhan kai nge ate Tuhan arus silakoken bas kegeluhenta. Ertoto la terjeng nehken sura-sura pusuh man Tuhan, nuriken perbeben geluhta, ertoto eme kesempatana megiken sora Tuhan ngendesken kegeluhenta ku bas penjayamen Tuhan kuga ras kai si ateNa jadi i bas kegeluhenta. Emaka i bas kita ertoto man Tuhan labo lit hakta mengintervensi Tuhan bas geluhta. Sabap IA me singelakoken kai ateNa si jadi bas geluhta. Lit waktunta ngerana ras Tuhan, berdiam diri di hadapan Tuhan, sungkun Tuhan kai nge rencana Tuhan si arus si lakoken bas geluhta.

I bas paksa tenengta sendah erpalasken Markus 1 : 35 Jesus pe ertoto man Bapa si ni surga, lampas erpagi pagi ope denga terang wari lawes IA ku ingan si melenget i je IA ertoto man Tuhan, si mpegegehi IA ngelakoken kerina pendahinNa. Dage adi Jesus selaku Tuhan pe tetap ertoto man Tuhan uga dage kita mbangun hubungenta ras Tuhan , lit nge si ban waktunta ertoto man Tuhan? I bas kesibukenta apai nge kita buen mbuka WA asangken mbuka pustaka, apai nge buen kita ngerana kerna Tuhan asangken ngerana kempak Tuhan i bas pertotonta? Kerina enda jadi sada kesempatan man banta gelah tetap erpengendes man Tuhan i bas kerina dampar kegeluhenta. Bahanlah maka pertotonta eme gegehta, kuasa toto mbelin banta. Tupung ertoto kita man Tuhan labo sura-suranta saja ngenca si peseh man baNa. Tapi ndengkehken sora Tuhan arah pertotonta reh deherna kita ras Tuhan arah pertotonta reh ngasupna kita megiken sura-sura Tuhan i bas geluhta.